

Schnitzelbankpredigt (AS + HK)

HK Liebi Fasnächtler,
 Üse Bibel-Text isch aktuell
 Er spricht usem volle Läbe.
 En ächte Lebens-Quell!
 Hät mer würklich vo öppis 100 Stück
 Bisch no fröhlich und voller Glück
 Chasch druf gah, es gaht nöd lang:
 Fehled eis! So isch de Gang!

 Und was cha nur alles verlore gah?
 De Schlüssel, es Handy oder s'Portmonee
 Wo hanis nur wieder liege lah?
 Im Büro, im Keller, ufem Cheminee?

 Und Läse-Brülle? Selbst wänn ich hätt 100 devo
 Das würd nöd lange, chasch druf gah
 Das nöd eini sich laht i dem Moment finde
 und die Ärm z'kurz! Da langsch di ade Grinde.

AS Das mag mer no alles lässig näh
 Aber isch es läbigs Wese verschwunde

Macht schnell die Panik hier die Runde
Da hilft au ke Schluck vom Beaujolais.

Wer da hät scho siis Tier müesse sueche?
D’Katz, d’Hund, d’Muus oder au d’Kueh?
Ihr müned scho ufstrecke! Es hilft kes flueche!
Das wott ich wüsse, ich geb ke Rueh! ...

Also Lucas du bisch enere guete Gsellshaft.
Tier zame hebe, das bruucht viel Kraft.
Die händ ebe alli ihre eigene Wille
Nöd immer chunt mer da zum chille.

HK Aber wer da ide tierische Runde
Hät scho einisch siis Chind verlore
Hät panisch gsuecht für mindestens e Stunde
Strecked uf? Wer hät scho müesse schmore? ...

Ja, Chind sind mängs wie en Sack voll Flöh
Da isch denn au nümm so viel mit «jöhkh»
Mini hät sich us versehe, das isch härt,
mit füfi inere Tüfgarage igsperrt.

Ich sag eu, da suecht mer extrem lang
Dem Papi isch gsi Angscht und bang.
Umso grösser isch us tüfschtem Grunde
Die Freud gsi, wo mer sie händ gfunde.

AS In de Wirtschaft sinds au am sueche
Es Stichwort isch de Fachkräftemangel
Sie werbet mit guetem Lohn un feine Kueche
Trotzdem händ nur selte öpper gshiits a de Angel.

DAS kännt Chile au nur zu guet.
Wer hät scho zum Schaffe als Pfaff oder Prieschter
Muet.
Es find sich eifach ke gueti Quelle.
So müends hüt scho Schöf und Küeh id Chile stelle.

Und Steischränzer triibts zu Verzwiifeligstat
mit ihre Werbeaktion im Feldheim ebe grad
händ mit Flyer das ganzi Areal tapeziert
denn hät de Abwart mit sim Psycholog telefoniert.

HK Also wänn do öpper total unmusikalisch isch
De Ton nöd trifft und schmöckt wie en Fisch

Wer unkreativ isch und fuul wie'n Bär
Bewerbe sich bi de Steischränzer.

Das erschti mal isch idem Jahr
de Steivater verlore gange mit sinre Schar
D'Spasslüten händ müesse gar lang warte
Wo isch de nur, hät de ke Navi oder Karte?

Nei, ade Karte häds nöd glege
Sis Gfährt hät leider mangels Pflege
Uf em Wäg de Dienst quittiert
So sind's ebe z'Fuess ane marschiert.

AS Au im VBS isch öppis verlore gange
S'Vertoue und a Gäld e ganzi Stange
Mer empfehled dringend guets Personal vo de Weid
E Kueh oder es Schaf, das wär en guete Entscheid.

So suecht jede öppis, nur inem andere Gwand
De Putin sis Gwüsse, de Trum sin Verstand
De Musk die Macht, u d'Schwyz en Bundesrat
Welles Schaf suech du im Moment ebe grad?

Was au immer du suechsch,
ei Sach isch klar
Welles Tier du au bisch
Es Schaf, e Kueh oder en Haas mit viel Haar,

Öpper hät dich scho lange gfunde
Er begleitet diis Läbe
Runde für Runde
Er fiired gar mit üs Fasnacht
Isch öpper, wo mit üs weint u'lacht

Dank Gott, du lebändigs Wort
Du suechsch und findsch üs a jedem Ort
So bitte mer dich, wänn mir inde nöchschte Täg
verlore gönd: bring üs zrugg uf de Wäg.

Und nun rüefed alli
in Gottes Namen
De Geist isch mit üch allne ...

(gemeinsam mit Gemeinde)

AMEN